

HOMILIA DO SANTO PADRE

Santa Missa

Esplanada de Tasi Tolu, Díli

Terça-feira, 10 de setembro de 2024

«Kosok-oan ida moris ona ba ita, oan-mane ida Maromak haraik ona ba ita» (Isaías 9, 5).

Ne'e mak liafuan sira nebé profeta Isaías hato'ó ba ema Jerusalem sira iha tempo ida nebé cidade ne'e riku loos, maibé infelizmente decadência moral mós buras tebes.

Iha rikusoin barak tebes, maibe moris di'ak ne'e halo ema kbiit na'in sira matan delek, hodi habosok sira ho ideia ida atu sai auto-suficiente, la percisa ona Na'i Maromak, no sira nia hanoin ida ne'e halo sira sai ema egoistas no injustus. Tanba ida ne'e, maski cidade ne'e iha rikusoin barak, ema kiak sira sai abandonadus no moris ho hamlaha, infidelidade sai buras no prática religiosa sai menus, loran ba loran, sai formalidade ida de'it. Mundo ida nebé husi oin habosok ema (falso), maibe subar hela realidade ida nebé nakukun, triste, todan no cruel, ho necessidade ba conversão, ba laran luak (misericórdia), no kura.

Tanba ne'e, profeta haklaken ba nia concidadão sira katak Maromak sei loke horizonte foun ida ba sira: futuro ida ho esperança no ksolok, iha nebé opresão no funu sei hetan bando ba nafatin (cf. Is 9, 1-4). Na'i Maromak sei halo sira nabilan ho roman boot ida (cf. V.1), nebé sei hasai sira husi nakukun sala nian nebé hanehan; no ida ne'e Na'i Maromak sei halo la'os ho força liman kro'at nian, ho kilat no rikusoin, maibe hodi haraik Oan Mane ida (cf. v. 5-6).

Mai ita para oituan hodi reflète imagem ida ne'e: Na'i Maromak halo nabilan nia roman maksoin liu husi karan (dom) oan mane ida.

Iha fatin hotu-hotu iha mundo ne'e, loran labarik ida nia moris mak momento nebé nabilan ho ksolok no festa, nebé hamosu iha ema hotu-hotu desejo (hakarak) di'ak sira atu hafoun-an iha buat di'ak, atu fila fali ba pureza no simplicidade. Iha bebe oan foin moris ida nia oin, ema nia fuan nebé toos liu hotu mós sei sai mamar no nakonu ho ternura; ema sira nebé desanimado mós hetan fali esperança, ema sira nebé rende ka hakiduk ona mós mehi fila fali no

fiar iha possibilidade atu hetan moris ida nebé diak liu tan. Kosok oan ida nia fragilidade lori-ho mensagem ida nebé forti tebes nebé toka to'o ba ema sira nebé fuan toos liu hotu, lori fila fali hakarak (propósito) sira atu hetan harmonia no hakmatek. Kmanek tebes buat nebé acontece wainhira kosok-oan ida moris.

Ne'e hotu simplesmente roman rohan oan ida nebé hatudu ba ita roman ida boot liu dok, tanba iha moris ne'e nia abut tomak ita hetan Na'i Maromak nia domin rohan laek, nia graça, nia providência, no kbiit husi nia Liafuan nebé cria. Maibe la'os ida ne'e de'it. Iha Cristo, Maromak rasik halo-an ba ema, kosok-oan, atu hakbesik-an ba ita no soi ita. Nune'e, iha mistério ne'e nia oin, convite nebé ita simu la'os atu ita admira no fuan sente, maibe mós atu ita bele loke-an ba Aman Maromak nia domin, no husik ita nia-an atu Na'i Maromak forma ita, atu nia bele kura ita nia kanek sira, hadi'ak fali nia desentendimento sira, tau ordem iha ita nia moris, to'o Nia nakfilak sai fundamento, iha buat hotu-hotu, ba ita nia moris pessoal no komunitaria.

Timor-Leste ne'e furak tanba iha labarik barak: imi mak nação nurak ida, iha nebé iha fatin hotu-hotu ita bele sente moris ida nebé bok-án hela, nafunan. No ida ne'e mak dom bot ida: presença ema foin sa'e barak no labarik sira continuamente hafoun moris matak (frescura), energia, ksolok, no entusiasmo imi nia povo nian. Maibe, liu tan ida ne'e, ne'e hatudu sinal ida, tanba fo fatin ba sira nebé ki'ik liu, simu sira, tau matan ba sira, no halo ita-an sai ki'ik iha Maromak futar-oin no iha ema seluk nia oin, sira ne'e hotu percisamente mak atitude nebé halo ita nakloke ba Maromak nia ação. Ho halo ita-an sai ki'ik, ita husik Na'i Maromak Kbiit-tomak Na'in bele halo buat boot sira, tuir sasukat Nia domin, hanesan Maria hanorin mai ita iha Magnificat (cf. Lc 1, 46-49) iha celebração ida ne'e.

Ida ne'e duni mak ohin ita venera Nossa Senhora nu'udar Liurai Feto, katak nu'udar Liurai ida nia inan, Jesus, nebé hakarak moris nu'udar Kosok-oan atu sai ita nia maun-alin, hodi confia nia hahalok kbit-na'in ba resposta "sim" nebé mai husi inan foin sa'e ida, kbit-laek no kiak (cf. Lc 1, 38).

No Maria compreende ida ne'e di'ak loos, to'o ba nia hili atu continua sai ki'ik nafatin iha nia moris tomak, lora ba lora sai ki'ik liu tan, hodi serbí no reza, hakiduk ba kotuk atu fo fatin ba Jesus, maski ida ne'e susar ba nia atu halo wainhira nia la compreende didi'ak buat hotu nebé acontece besik ba nia.

Tanba ne'e, maun-alin inan-feton doben sira, mai ita keta ta'uk atu sai ki'ik iha Na'i Maromak futar oin no iha ema seluk nia oin, atu lakon ita nia moris, atu fo ita nia tempo, no hare fila-fali ita nia programa sira, husik tiha buat ruma husi ita nia-an, atu maun-alin ida ka inan-feton ida bele sai di'ak liu tan no haksolok. Mai ita keta tauk, to'o ba redimensiona fila fali ita nia projeto sira se ida ne'e necessario, la'os atu hamenus tiha projeto sira ne'e, maibe atu halo sira sai furak liu tan liu husi ita nia fo-an rasik, no ita nia hahalok simu ema seluk, no nia imprevisibilidade nebé buat ne'e lori-ho. Tanba realeza nebé loloos mak ida nebé fo nia moris tanba hadomi: hanesan Maria, hanesan Jesus nebé iha cruz fo ona buat hotu, sai ki'ik, indefeso, no kbit-laek (cf. Fil 2, 5-8), atu fo fatin ba ita ida-idak iha Aman Maromak nia reino (cf. Jo 14, 1-3).

Buat sira ne'e hotu simbolisado di'ak loos liu husi adorno (futar) rua nebé furak tebes: Kaibauk no Belak. Buat rua ne'e hotu halo husi osan folin bot. Significa katak ne'e sasan importante!

Ida primeiro, Kaibauk, simboliza karau dikur no loromatan nia roman, no ida ne'e tau iha as, hafutar ren-tós, nune'e mós iha uma kakuluk tutun, la'o tuir forma uma kakuluk nian. Ida ne'e hatudu ba kbit, energia no manas, no bele representa kbit Na'i Maromak nian nebé fo moris. Maibe la'os ida ne'e de'it! Tanba ema coloca nia iha ulun no iha uma kakuluk tutun, ida ne'e fo hanoin ita katak, ho roman Na'i Maromak nia Liafuan no ho força husi nia graça, ita mós bele serbisu hamutuk iha plano boot salvação nian, liu husi ita nia escolha sira no ação sira.

Ida segundo, Belak, ema tau iha hirus-matan no nia completa ida primeiro. Nia fo hanoin ita kona ba fulan nia nabilan, kona ba rai-kalan nebé ho haraik-an reflète loromatan nia roman, hodi falun buat hotu ho roman mihis-mamar ida. Futar ne'e Significa paz, fertilidade, no laran-kmaus, no simboliza inan ida nia ternura, inan ida nebé ho nia domin nebé delicado tebes halo nabilan buat hotu nebé nia kaer ho roman nebé nia simu husi Na'i Maromak.

Kaibauk no Belak, força no ternura husi Aman no husi Inan: nune'e mak Na'i Maromak hatudu Nia realeza, nebé halo ho caridade no misericórdia.

Tanba ne'e, iha Eucaristia ida ne'e, hamutuk, ita ida-idak nu'udar mane no feto, nu'udar Igreja no sociedade, husu graça sabedoria atu bele reflète iha mundo roman nebé forte no terna (mamar) husi Maromak domin nian, husi Maromak ida ne'bé, hanesan ita hananu iha Salmo

responsorial, «foti ema kbit laek husi rai rahun laran no hasai ema kiak husi kiak, atu halo sira bele tur iha ema bot sira let [...] husi Nia povo » (Sal 112, 7-8).

Traduzido por Marvel

@ DEPARTAMENTO COMUNICAÇÃO CET

